

Պատերազմների ժամանակ, իւրաքանչիւր հակառակ կողմերի, թէ յաղթութեան եւ թէ յաղթելու միջոցին, բնակիչների վիճակը սարսափելի էր: Օրինակ, մի ցեղ կամենում է խլել միւս ցեղի ձեռքից երկրի այս կամ այն մասը նա կամ յաղթելով տիրում է, կամ աւար անելով, թալանելով ամէն հանդիպածը, ետ է դառնում: Այսպիսի դէպքերում ժողովուրդը թողնում է իր տունը, տեղը, մշակութեան դաշտերը, եւ իր գլուխը միայն ազատելու համար, պատսպարում է լեռների անմատչելի տեղերում: Կռիւը տեսում է երկար: Անասունները, անտեր մնալով, թշնամին կողոպտում է. հունձքը, անխնամ մնալով, չորանում է, ոչնչանում է, եւ կռիւներից յետոյ վրայ է հասնում մի նոր, ամենասարսափելի թշնամի-սովը:

Ժողովուրդը միշտ գտնում էր անվերջ երկիւղի եւ յուսահատութեան մէջ: Նա չգիտէր, թէ եզուց կարո՞ղ է հանգիստ լինել, որովհետեւ թշնամին միշտ կանգնած էր որպէս ասում են՝ նրա քամակին: Կռիւների փոթորիկների մէջ եթէ մի անգամ զրկոեցան նրա մշակութիւնները բերքից, միւս օրը նա ուտելու հաց չունէր: Որովհետեւ նա ապագայի համար պաշար չէ պահում, նախ, որ ապահով տեղ չունի պահելու, երկրորդ, աւելորդ ծանրութիւնը միշտ արգելում է նրա փախուստը թշնամու ձեռքից, երբ նա աշխատում է ազատել իր գլուխը միայն:

Կռիւները, ժողովրդի անդադար անցնելը մէկ տիրապետողից դեպի միւսը, սպառում էին բնակիչների կեանքը սրով, կրակով եւ սովով:

Յանկարծ երկրի նախկին տիրապետողն իրան յաղթած է համարում. որպէսզի նա յաղթողի համար շահուելու ոչինչ չթողնէ, հրդեհում է ամբողջ գիւղորայք, աւերում է քաղաքները, կրակ է տալիս հասունացած հունձքերին, եւ բոլորովին անապատ դարձնելով երկիրը, որ պատկանում էր իրան, այնպէս թողնում է եւ հեռանում: Այսպիսի հանգամանքներում քուրդը կորցնելու ոչինչ չունէր, որովհետեւ նա մի ժամանակաւոր հիւր էր. իսկ այն բոլոր կրակի նիւթ դարձած շինութիւնները պատկանում են հայ կամ օտարազգի բնակիչներին. այն բոլոր մշակութեանց արդիւնաբերութիւնը նրանց ձեռքերի վաստակն է: Նոյն բարբարոսութեամբ վարում էր եւ յարձակողը, երբ տեսնում էր թէ տիրելու անկարող է: Նա խոյս էր տալիս կռուի դաշտից, իր հետքից թողնելով աւերակներ եւ ամայութիւն:

Ժողովուրդը միշտ գտնում էր նոյն դրութեան մէջ, որպէս մի թռչուն, որի բոյնը քանդոած էր չար երեխայի ձեռքով. նա նստած է միշտ օրօրոհ տերեւի վրայ եւ չգիտէ ի՞նչ անէ: Բնակիչը սիրտ չունէր կրկին նորոգելու իր խրճիթը, որովհետեւ մտածում էր՝ արդեօք երկա՞ր կարող է բնակուել նրա մէջ. սիրտ չունէր միւս անգամ ցանել իր արտը, որովհետեւ յոյս չունէր, թէ կը